





PRESS-RELIZ

O'zbekistonlik qizlar xalqaro ta'lim dasturi doirasida nano sun'iy yo'ldoshni yig'ib, samoga uchiradilar

TOSHKENT, 2021 yil 2-noyabr – UNICEF, Tech4Impact NNT va Oʻzbekiston Respublikasi Innovatsion rivojlanish vazirligi fan, texnologiya, muhandislik va matematika (STEM - Science, Technology, Engineering and Mathematics) sohalariga qiziquvchi qizlar uchun UniSat xalqaro ta'lim dasturini rasman ishga tushirdi. Qizlarning kosmik tadqiqotlarga qiziqishini oshirishga qaratilgan ushbu dastur UNICEFning Oʻzbekiston, Qozogʻiston va Qirgʻizistondagi vakolatxonalari tomonidan qoʻllab-quvvatlanadi.

"Dunyoning boshqa mamlakatlarida boʻlgani kabi Oʻzbekistonda ham turli sabablarga koʻra oʻgʻil bolalar va qizlar oʻrtasida kompyuter savodxonligi, texnik ta'lim va kasb-hunar boʻyicha sezilarli farq saqlanib qolmoqda. UniSat ta'lim dasturi bu tafovutni qisqartirishga, qizlarni tegishli fan va texnologiyalarga ragʻbatlantirib, tegishli koʻnikmalariga ega boʻlishlariga yordam beradi", dedi UNICEFning Oʻzbekistondagi vakolatxonasi rahbari Munir Mamedzade. "UniSat Oʻzbekiston yoshlari oʻrtasida texnologik sohalarda gender masalasiga keng jamoatchilik e'tiborini qaratishga yordam beradi", deya ta'kidladi u.

Dastur davomida Oʻzbekistonning barcha viloyatlaridan tanlovdan oʻtgan 15-24 yoshli qizlar dasturlash va muhandislik boʻyicha bilimlarini oshirish, shuningdek, jamoada ishlash va loyihalarni boshqarish koʻnikmalarini yaxshilash imkoniyatlariga ega boʻladilar. Ishtirokchilar nano sun'iy yoʻldoshni loyihalashtirib uni yigʻadilar hamda stratosferaga uchiradilar. Bunda qizlarga professional muhandislar va dasturchilar jamoasi yordam beradi.

"Innovatsion rivojlanish vazirligi UniSat dasturini qoʻllab-quvvatlashdan mamnun. Oʻzbekiston qizlari ilm-fan, muhandislik va ilgʻor texnologiyalar sohasida rivojlanish uchun katta salohiyatga ega va biz qizlarni nanosun'iy yoʻldoshni uchirishda oʻz kuchlarini sinab koʻrishga taklif qilamiz", dedi Innovatsion rivojlanish vaziri oʻrinbosari Shahlo Turdiqulova. "Vazirlikda nano sun'iy yoʻldoshlarni loyihalash va yigʻish uchun barcha shart-sharoitga ega laboratoriya mavjud boʻlib, vazirlik eshiklari yoshlar uchun doim ochiq. Ehtimol, STEM sohalari sizning kelajakdagi kasbingizga aylanadi!"

Oʻquv dasturining yakuniy bosqichida nano sun'iy yoʻldoshni yigʻish uchun uchta respublikadan qizlar Alamtidagi Al-Farobiy nomli institutda yigʻiladilar. Nano sun'iy yoʻldoshni Oʻzbekistonda uchirish 2022 yil 12-aprelga rejalashtirilgan. Qizlarning oʻzlari parvoz rejasini tuzib, aeronavigatsiya xizmati mutaxassislari nazorati ostida nano sun'iy yoʻldoshni Oʻzbekistondagi maydondan uchiradilar.

Ishlab chiqilgan va stratosferaga uchirilgan nano sun'iy yoʻldosh qizlarga Yer va yulduzlarning yuqori aniqlikdagi suratlarini olish imkonini beradi. O'rnatilgan sensorlar kelajakda ilmiy tadqiqotlar uchun foydali bo'lishi mumkin bo'lgan ma'lumotlarni to'playdi.

"Biz hamkorlar bilan O'zbekistonda qizlar uchun shunday noyob dasturni yo'lga qo'yganimizdan mamnunmiz" dedi Tech4Impact nodavlat tashkiloti rahbari Saida Yusupova. "UniSat dasturida ishtirok etish qizlar uchun STEM sohasida yangi bilimlarga ega bo'lish, jamoada ishlashni o'rganish, koinot va sun'iy yo'ldoshlar haqida ko'proq ma'lumot olish, O'zbekistonning va dunyoning eng yaxshi universitetlariga o'qishga kirish uchun darsdan tashqari mashg'ulotlarda tajriba orttirish, kosmos va muhandislik sohasidagi mashhur ayollar bilan tanishish uchun ajoyib imkoniyatdir. UniSat dasturiga ro'yxatdan o'tish 10-noyabrgacha davom etadi va barcha STEM fanlariga qiziquvchi qizlarni ro'yxatdan o'tishga taklif qilamiz!"

Ommaviy axborot vositalari murojaat qilishlari uchun kontaktlar:

Nazokat Abduqunduzova O'zbekiston Innovatsion rivojlanish vazirligi Matbuon kotibi Telefon: 99899 302 26 00 El.pochta: n.abduqunduzova@mininnovation.uz	Elena Selezneva Tech4Impact NNT Loyihalar bo'yicha menejer Telefon: 99890 989 72 58 El. pochta: info@tech4impact.uz
Inna Volfson UNICEFning O'zbekistondagi vakolatxonasi Yoshlar va o'smirlar rivojlanishi bo'yicha maslahatchi Tel. +998935055256 El.pochta:iwolfson@unicef.org	Nargiza Egamberdiyeva UNICEFning O'zbekistondagi vakolatxonasi Jamoatchilik bilan aloqalar bo'yicha maslahatchi Telefon: 99893 380 34 19 El.pochta: negamberdieva@unicef.org

Dasturning rasmiy sayti: www.unisat.uz